



大明會典卷之六十四

禮部二十三

婚禮一

天子納后儀

正統七年定

納采問名

前期擇日遣官告

天地

宗廟至期前一日所司設

御座于

奉天殿鴻臚寺設

制案節案於

御座前。內官監禮部陳禮物於文樓下。教坊司設中

和樂於殿內。至期清晨。錦衣衛設鹵簿於

丹陛丹墀。禮部陳禮物於

丹陛上及文樓下。設綵輿於

奉天門外。教坊司設大樂於

奉天門內。鼓三嚴。鍾止。鴻臚寺奏請陞殿。

上具冕服。導駕奉引如常儀。陞座。文武官朝服叩頭

訖。執事引正副使朝服就拜位。行四拜禮。傳

制官奏傳

制訖。由東門出。執事舉

制案節案由中門出。禮物在

丹陛上者隨之。俱置

丹陛中道。傳

制官宣

制曰。茲選某官某女為

皇后。命卿等持節行納采問名禮。正副使又行四拜

禮。鴻臚寺奏禮畢。

上興。引禮引

制案節案用傘蓋遮護。由

奉天門中門出。執事引文樓下禮物隨出。至奉天門外。正副使取

制書置綵輿中。儀仗大樂前導。從中門中道行。出大明門外。正副使釋朝服乘馬行。詣

皇后第行禮。

皇后第前一日設正副使幕次于大門外左南向。設香案於正堂中。設

制案節案于香案南。別設案於香案之北。其日正副使至大門外。儀仗大樂分列。置綵輿於正中。設

制案節案於綵輿北。引禮引正副使入幕次。執事

官陳禮物於正堂。正副使出幕次取

制書置案上。禮官一員先入正堂。立於東。主婚者

朝服出見。立于西。禮官曰奉

制建后。遣使行納采。問名禮。引主婚者出迎。引禮

引正副使捧

制書及節先行。主婚者隨行。至正堂置

制書及節于案。正使立于案左。副使立于案右。引

禮引主婚者就拜位。行四拜禮。詣案前跪。正

使取納采

制宣訖。授主婚者。主婚者受之。授執事者。置于北案上稍左。副使取問名。

制宣訖。授主婚者。主婚者受之。授執事者。置于北案上稍右。主婚者俯伏興平身。執事者舉荅問名表。案于主婚者後少西。取表授主婚者。主婚者受表。跪授正使。主婚者俯伏興平身。退就拜位。又行四拜禮畢。正副使出置表綵輿中訖。主婚者至正副使前。致詞云。請禮從者。酒饌畢。主婚者捧幣以勞正副使。正副使出。主婚者送至大門外。正副使進發綵輿於

大明等門左門入。至奉天門外。以表節授司禮監官奏

聞復命

納采制

朕承天序。欽紹鴻圖。經國之道。正家為本。夫婦之倫。乾坤之義。實以相

宗祀之敬。協奉養之誠。所資維重。祇遵

聖祖母太皇太后

聖母皇太后命。今遣使持節。以禮采擇

問名制

朕惟夫婦之道。大倫之本。正位乎內。必資名家。特遣使持節。以禮問名。尚佇來聞。

答辭

臣某伏承嘉命。正使某官某等重宣

制。詔問臣名族。臣女。臣夫婦所生。先臣某官某之玄孫。先臣某官某之曾孫。先臣某官某之孫。先臣某官某之外孫。臣女今年若干。謹具奏

聞

納吉納徵告期

前一日。所司設

制案節案禮物中和樂。至期清晨。設鹵簿綵輿大樂。傳

制遣使。並同前。納采問名儀。但納徵用玄纁束帛六馬等物。

制詞云。茲聘某官某女為

皇后。命卿等持節行納吉納徵告期禮。

皇后第。前一日設正副使幕次香案

制案節案別設案。並同前。受納采問名儀。惟更設玉帛案。其日正副使至

皇后第於綵輿中取

制書玉帛置案上少候執事先設

皇后冠服諸禮物於正堂六馬陳於堂下禮官一員入正堂主婚者出見禮官曰奉

制聘

皇后遣使行納吉納徵告期禮主婚者出迎執事舉玉帛案前行正使於案前取納吉納徵

制書捧之副使取告期

制書及節捧之次行主婚者後隨至正堂正副使各以

制書及節置案上退立案之左右相向置玉帛案于

制書案之南引禮引主婚者就拜位行四拜禮引詣案前跪正使取納吉納徵

制書以次宣訖授主婚者主婚者受

制以授執事者執事者跪受置于北案正使捧圭授主婚者主婚者受圭以授執事者執事者跪受置于北案副使捧圭授主婚者主婚者受圭以授執事者執事者跪受置于北案副使取告期

制書宣訖授主婚者主婚者受

制以授執事者執事者跪受置于北案主婚者俯

伏興平身復位行四拜禮畢正副使持節出

以節置綵輿中主婚者送至門外請禮從者

及捧幣勞正副使俱同前正副使還至

奉天門外以節授司禮監官捧入復

命

納吉制

大婚之卜龜筮卿士協從敬循禮典遣使持

節告吉

納徵制

卿女有貞靜之德稱母儀之選宜共承

天地

宗廟特遣使持節以禮納徵

告期制

歲令月良吉日某甲子大婚維宜特遣使持

節以禮告期

發冊奉迎

前一日所司設樂儀仗如常儀至期清晨鴻

臚寺設

制書案節案冊案寶案於御座前。禮部陳鴈及禮物於

丹陛上。設綵輿於

奉天門外。內官監陳設

皇后鹵簿車輅禮物於綵輿南。其傳

制遣使。並同前納采問名儀。但改

制詞云。茲冊某官某女為

皇后。命卿等持節奉冊寶行奉迎禮。其

制冊寶節用傘蓋遮護。從中門出。執事舉鴈及禮

物隨行。正副使亦隨行。詣

皇后第行禮。其奉迎用旗手衛鼓吹前導。設而不作。

教坊司作樂如常儀。是日內官設

皇后幕次於內殿南。北向。設

上與

皇后各更服處於內殿。

皇后第前一日設正副使幕次于大門外南向。設香

案

制書案節案冊寶案于正門中。又設香案

制書案節案于正堂。別設案于正堂北。其日正副

使至。於綵輿中取

制書冊寶置案上。入次少候。女官奉

皇后首飾。禕服入中堂左。內官陳儀仗車輅等物于大門內。禮官一員先入。主婚者朝服出見。禮官曰奉

制冊

后。遣使持節奉冊寶行奉迎禮。主婚者出迎。執事者舉冊寶案前行。正副使捧

制書及節次行。執事者執鴈及禮物隨入。主婚者從行。至正堂。正副使置制節于案。執事者置冊寶案於

制節之南。冊東。寶西。正使立於案左。副使立于案右。相向。引禮引主婚者就拜位。行四拜禮。退立於西南。女官以首飾禕服進

皇后。內官進

皇后儀仗於中堂前。設女樂於堂下。作止如常儀。司禮監官進前受節冊寶。正副使於案取節冊寶授之。仍前立候。內贊二人引捧節冊寶監官入中堂前各置于案。

皇后具服出閣。女官及宮人擁護。詣香案前向闕立。內贊贊行四拜禮。贊宣冊。贊跪。

皇后跪。宣冊官取冊立宣於

皇后之左。訖。贊受冊。贊搢圭。宣冊官以冊進授

皇后。皇后受冊。以授女官。女官跪受。立于西。贊宣寶。

宣寶官取寶立宣於

皇后之左。訖。贊受寶。宣寶官以寶進授

皇后。皇后受寶。以授女官。女官跪受。立于西。贊出圭。

贊興。又贊四拜禮畢。

皇后入閣。持節監官由正門出授正副使。報受冊寶

禮畢。引禮引主婚者詣案前跪。正使取奉迎

制宣訖。授主婚者。主婚者授執事。置于北案。執事

者以鴈及禮物進。副使以次受之。授主婚者

主婚者授執事。皆置于案。又贊四拜禮畢。正

副使出大門外。置節綵輿中。主婚者請禮從

者。及以幣勞正副使同前。司禮監官嚴整鹵

簿。復以奉迎禮入。達于女官。女官奉請

皇后冠服出閣。女樂前導。宮人擎執擁護。自東階下

立香案前。內執事贊四拜畢。請

皇后陞堂南向立。主婚者進立于

皇后之東。西向。曰。戒之敬之。夙夜無違命。畢。退立于

東階西向。毋進立于

皇后之西。東向。施衿結帨。曰。勉之。敬之。夙夜無違。畢退。立于西階。東向。內執事奏請乘輿。

皇后降階。陞輿。侍從如儀。內執事導從出門。奉迎儀仗。大樂前行。綵輿次行。正副使隨行。司禮監官擁導。

皇后鹵簿。冊寶。綵輿行。宮人乘轎。內官內使衛護。從大明門中門入。文武百官具朝服。於

承天門外。東西向立班迎候。輿入

承天門退。

皇后輿輅至

午門外。鳴鐘鼓。鹵簿止。正副使以節授司禮監官

先入復

命。捧冊寶。官捧冊寶。傘扇儀仗。女樂前導。宮人擁護。

皇后輿由

奉天門。進內庭幕次。捧冊寶。監官以冊寶授女官。皇后出輿。由西階進。

上由東階降。迎於庭。揖

皇后入內殿。內侍請

上詣更衣處。具袞冕。女官請

皇后詣更服處更禮服。

上同

皇后詣

奉先殿行禮。捧冊寶。女官以冊寶置

皇后宮中。內官以

皇后車輅鹵簿入

午門。過

御橋。由中右門進

皇后宮中

冊文

朕躬膺

天命。祇嗣

祖宗大位。統馭天下。致理之本。肇自正家。惟夫婦之

道。體乾坤之義。越稽古先聖君明王。咸有令

德。輔成於內。以興王化之美。以厚萬福之原。

咨尔某氏。生于勲門。天稟純茂。慈惠貞淑。靜

一誠莊。敬承姆師。恒循禮度。敷求懿德。穆卜

大同。今遣使持節。以金冊金寶。立尔為

皇后。於戲。惟君暨后。奉神靈之統。理萬物之宜。惟孝

惟誠。以奉

九廟之祀。惟敬惟愛。以承

兩宮之懽。惟勤致儆。戒相成之益。惟無忘詩書圖史
之規。惟謙和以睦宗姁。惟節儉以處富貴。弘
樛木逮下之惠。衍螽斯蕃衍之祥。于以表正
六宮。于以母儀四海。懋欽乃行。用永光華。

謁廟

是日早。內官於

奉先殿陳設牲醴。祝帛畢。候

上同

皇后至。贊引引就拜位。

上在東。

皇后在西。行禮如常儀。祭畢。還宮。

合卺

是日。內官先於

正宮殿內設

上座于東。

皇后座于西。相向。置酒案于正中。稍南。置四金爵。兩
盃於案上。謁

廟還。內侍女官請

上與

皇后各就更服處。

上服皮弁服陞內殿。

皇后更衣從陞。贊請陞座。執事者舉饌案於

上與

皇后前。女官司尊者取金爵酌酒以進。飲訖。女官進饌。舉饌訖。女官再取金爵酌酒以進。飲訖。進饌。女官以盃盞酌酒合和以進。飲訖。又進饌。舉饌畢。內侍奏禮畢。

上同

皇后興。內侍女官執事。奏請

上與

皇后就更服處易常服。

皇帝從者。餞

皇后之饌。

皇后從者。餞

皇帝之饌。

兩宮朝見

第二日早。

上冕服。

皇后禮服。詣

某宮俟。

某宮禮服陞座。贊引引

上與

皇后詣

某宮前。宮人以服脩盤立于

皇后左。贊禮贊

上與

皇后皆四拜。執事二人舉案至

某宮正中。宮人以服脩盤授

皇后。

皇后捧置于案上。執事女官舉案。

皇后隨舉。進至

某宮前。

皇后復位。贊禮贊

上與

皇后皆四拜。執事者舉服脩案徹于西。贊禮畢。

皇后還宮

謝恩

第三日早。

上冕服。

皇后禮服同詣

某宮前八拜禮訖。

皇后詣內殿俟。

上服皮弁服陞座。贊引女官引

皇后禮服詣

上前就拜位。行八拜禮畢。

皇后還宮。陞座。引禮引在內親屬。贊八拜禮。次引六

尚等女官。贊八拜禮。次引各監局內官內使。

行八拜禮畢。降座入閣。是日。

上受

皇后謝恩禮畢。出具服御

奉天殿。頒

詔布告中外。行禮如常儀。

詔

朕以天序。祇承大統。君臨海宇。子育兆民。仰

惟隆古帝王。政由彛教。禮謹大婚。茲承

聖祖母太皇太后

聖母皇太后命。慎簡賢淑。作配朕躬。謹昭告

天地

宗廟。以某年某月日。冊某氏為

皇后正位中宮。以共承宗祀。協贊化理。敷告中外。咸使聞知。

受賀

第四日。文武百官具朝服上表慶賀。陳設如常儀。

上具袞冕御華蓋殿。

親王先行八拜禮慶賀。次執事官行五拜三叩頭禮畢。鴻臚寺奏請陞殿導。

駕官前導。百官進表。行禮如常儀。其親王行禮畢。詣內殿。

某宮前。

皇后前俱行慶賀八拜禮。出。是日

某宮具禮服陞內殿。受內外命婦慶賀禮。外命婦進表。如常儀。

皇后禮服陞殿。受內外命婦慶賀禮。外命婦進箋如常儀。

盥饋

第五日清晨。尚膳監具膳羞。

皇后具禮服詣

某宮。俟膳至。贊引引

皇后詣前。贊四拜。尚食以膳授。皇后捧膳進于案。復位贊四拜。贊引引。皇后退立于西南。俟膳畢。引出還宮。

大明會典卷之六十四

大明會典卷之六十五

禮部二十四

婚禮二

皇太子納妃儀

成化二十三年定

納采問名

前期擇日。遣官告

太廟。牲用犢各一。用祝文。至期前一日。所司設御座於

奉天殿。鴻臚寺設

制案。節案於

御座前。內官監禮部陳禮物於文樓下。教坊司設中和樂於殿內。至日清晨。錦衣衛設鹵簿於丹陛。丹墀。禮部設綵輿。教坊司設大樂。俱於

奉天門外。

上具袞冕御

華蓋殿。鴻臚寺奏執事官行叩頭禮畢。請陞殿導駕奉引如常儀。

上御奉天殿。文武官朝服叩頭訖。執事引正副使朝服就拜位。行四拜禮。傳

制官奏傳

制訖。由左門出。執事官舉

制案節案亦由左門出。傘蓋遮護。置丹墀中道。傳

制官宣

制曰。茲擇某官某女為

皇太子妃。命卿等持節行納采問名禮。正副使又行四拜禮。鴻臚寺奏禮畢。

上興。引禮引節案

制案由

奉天門左門出。執事官引文樓下禮物隨出。至奉天門外。正副使取節

制書置綵輿中。儀仗大樂前導。從二門行出東長安門外。正副使釋朝服。乘馬隨行。詣皇太子妃府行禮。

受納采問名

皇太子妃府前一日。設正副使幕次于大門外道左南向。設香案于正堂中。設

制案節案于香案南。別設案於香案之北。其日正副使至大門外。儀仗大樂分列。置綵輿於正中。設

制案節案於綵輿北。引禮引正副使入幕次。執事

官陳禮物於正堂。正副使幕次取節

制書置案上。禮官一員先入正堂。立於東。主婚者朝服出見。立於西。禮官曰奉

制聘

皇太子妃。遣使行納采問名禮。引禮引主婚者出迎。引禮引正副使捧節及

制書先行。主婚者隨行。至正堂置節及

制書于案。正使立於案左。副使立於案右。引禮引主婚者就拜位。行四拜禮。詣案前跪。正使取納采

制宣訖。授主婚者。主婚者受之。授執事者。置于北案上。稍左。副使取問名。

制宣訖。授主婚者。主婚者受之。授執事者。置于北案上。稍右。主婚者俯伏興平身。執事者舉答。問名表案于主婚者後。少西。取表授主婚者。主婚者受表。跪授正使。正使置表于案。主婚者俯伏興平身。退就拜位。又行四拜禮畢。正副使出。置表綵輿中。訖。主婚者至正副使前。致詞云。請禮從者酒饌畢。主婚者奉幣以勞正副使。正副使出。主婚者送至大門外。正副

使進發綵輿於

東長安門入至

奉天門外。以節表授司禮監官奏

聞復

命

納徵告期冊封

先期一日。遣官告

太廟。所司設

制案。節案。冊案。

妃冠服禮物。中和樂。至日清晨。設鹵簿。綵輿大樂。

傳

制遣使禮儀。並同前納采問名儀。但設妃儀。仗車輅於

左順門外。候禮物過。隨行。又改

制詞云。茲冊某官某女為

皇太子妃。命卿等持節行納徵告期冊封禮

受納徵告期冊封

皇太子妃府。前一日。設正副使幕次。香案

制案。節案。冊案。玉帛案。並同前。受納采問名儀。但

納徵用玄纁束帛。轂圭八馬等物。其日正副

使至

皇太子妃府。於綵輿中取節

制書冊玉帛。置於案。少候。執事先設

皇太子妃冠服諸禮物於正堂。八馬陳於堂下。禮

官一員先入正堂。主婚者朝服出見。禮官曰

奉

制封

皇太子妃。遣使行納徵告期冊封禮。主婚者出迎。

執事舉玉帛冊案前行。正使於案取節及納

徵

制書副使取告期

制書捧之以次行。主婚者後隨。至正堂。正副使各
以節

制書置于案。退立于案之左右。東西向。置玉帛冊
案于

制書案之南。引禮引主婚者就拜位。行四拜禮。引
詣案前跪。正使取納徵

制書宣訖。授主婚者。主婚者受之以授執事者。執
事者跪受。置于北案。正使捧圭授主婚者。主
婚者受之以授執事者。執事者跪受。置于北

案。副使捧纁授主婚者。主婚者受之以授執
事者。置于北案。副使取告期

制書宣訖。授主婚者。主婚者受之以授執事者。置
於北案。主婚者俯伏興平身。復位。行四拜禮
畢。正副使入次少候。女官捧

皇太子妃首飾冠服入中堂左。內官陳儀仗車輅
等物於大門之內。女官以首飾冠服進

皇太子妃。內官進

皇太子妃儀仗於中堂前。司禮監官進前受節冊。
正副使於案取節冊受之。仍前立候。內官二

人引捧節冊監官入中堂前各置于案。
皇太子妃具服出閣女官及宮人擁護詣香案前
向

闕立贊禮女官贊行四拜禮贊宣冊贊跪。

皇太子妃跪宣冊女官取冊立宣於

妃左訖贊受冊贊搯圭宣冊官以冊進授

皇太子妃妃受冊以授女官女官跪受於右立於

西贊出圭興又贊四拜禮畢。

皇太子妃入閣持節監官由正門出授正副使報

受冊禮畢正副使出大門外置節綵輿中主

命
婚者請禮從者及以幣勞正副使還至
奉天門外以節授司禮監官捧入復

醮戒

先期一日所司設

皇太子幕次於中左門前丹墀內設

皇太子受醮戒位於

御座南北向設

皇太子拜位於

丹陛上北向設贊禮二人位於

皇太子

丹陛上拜位之北。東西相向。知班二人位於贊禮之南。東西相向。設酒饌案於醮戒位之東。稍北。設司爵司饌各二人。位於案之南。西向。執膳內官先備金爵果盒以候。是日早。鴻臚寺贊引二人具朝服并

東宮侍從官。先入至

文華殿門前候

皇太子出。行叩頭禮。贊引二人及侍從官導從。由奉天左門入。至幕次具衮冕以候。鼓三嚴。

上御通天冠絳紗袍。出鴻臚寺請陞座。

上御奉天殿。樂作。警蹕。文武官盛服行叩頭禮。分班列侍如常儀。樂止。贊引及侍從官導引

皇太子出幕次至東陛下。侍從官止。贊引導引

皇太子由東階陞。至

丹陛拜位北向立。贊禮贊鞠躬四拜興平身。贊引導引

皇太子由

奉天殿左門入。就醮戒位北向立。司爵斟酒以進。贊引贊跪。

皇太子跪。贊搢圭。贊受爵。司爵者以爵立授。皇太子。皇太子啐酒訖。以爵授內使。內使跪受爵。退。置于案。司饌者以果盒跪進。

皇太子。皇太子取少許食訖。司饌者興。以果盒退。置于案。贊出圭。贊恭聽。

戒命。

上命之曰。往迎尔相。承我宗事。勗帥以敬。

皇太子曰。臣謹受。

命。贊俯伏興平身。贊復位。贊引仍導。由左門出。至丹陛上拜位立定。贊禮。贊鞠躬四拜興平身。贊禮。

畢。樂作警蹕。

上降座還宮。樂止。贊引導。

皇太子。由東陛降丹墀。

東宮內外官偕導。從。由

奉天左門出。

午門外幕次易服。

妃受醮戒。

親迎日。

妃家先於祠堂陳設祭物。

妃服燕居冠服。

妃父母妃詣祖宗前行禮奠酒讀祝。禮畢。執事者具酒饌於內。進

妃飲食訖。父母坐於正堂。女執事引妃詣父母前各四拜。父命之曰。尔往

大內。夙夜勤慎。孝敬毋違。母命之曰。尔父有訓。尔當敬承。

妃聽受訖。次詣諸尊長行禮畢。改服翟衣以候親

迎

親迎

是日早先設

皇太子幕次。及儀仗奠鴈。并所乘輅。教坊司大樂

及隨侍官舍侍衛官軍。俱于

午門外。

妃家先設

皇太子幕次于中門之外南向。設香案奠鴈案于中堂。

皇太子受醮戒訖。贊引導引至

午門外幕次。易皮弁服訖。贊引跪請陞輅。

皇太子陞輅。執鴈者後隨。樂作。儀從先導。隨侍官舍官軍導。後由

東長安門至

妃家門外。贊引跪請

皇太子降輅。導引至幕次。禮官一員先入至正廳。立於東。西向。主婚者具朝服出見。立於西。東向。禮官曰。

皇太子奉

制。行親迎禮。引禮二人具服。引主婚者迎

皇太子於幕次之外。內官二員具服。引

皇太子出幕次。主婚者請

皇太子入中堂。

皇太子先行。內官具服捧鴈隨入。主婚者後行。至

中堂。主婚者進立於堂中之左。

妃母立於堂中之右。東西相向。

皇太子至中堂。女執事二人引

妃出房。立于妃母之下。內官引

皇太子至案前。內官捧鴈跪進

皇太子。皇太子以鴈奠于案。內官引

皇太子稍退。近東西向立。主婚者詣鴈案前行八

拜禮。退復位。執事者徹案。引禮內官導

皇太子先行。至中門。女轎夫舉鳳轎至於中門之

內。內官具

妃儀仗于中門之外。女執事引

妃出。內官跪請

皇太子詣轎所。啓請揭簾。

妃陞轎。內官啓請

皇太子陞輅前行。

妃具儀仗從後行。由

東長安門進至

午門外。

東駕儀仗侍衛官舍官軍俱止。

妃儀仗入

左順門內候。內官跪請

皇太子降輅。導引入幕次候。

妃至轎止。內官跪請

皇太子揭簾。

妃降輅。

皇太子先行。內執事以帷幕擁護

妃後行。俱步入

左順門內。內官跪請

皇太子乘輿先行。女官跪請

皇太子妃陞轎。後行至宮門外。

皇太子降輿。候

妃至。女官跪啓請

皇太子妃降轎。入幕次候行合巹禮

合巹

其日。內官先于

皇太子內殿外設

妃幕次。設

皇太子座于殿東。西向。設

妃座于西。東向。各設拜位於座之南。設酒案于正

中稍南。置兩爵兩盃于案上。

皇太子至宮門外。降輿入候于內殿門外之東。西
向。

妃降轎。女官以帷幕擁護。導引入幕次。整飾訖。導
引至內殿門西。東向。贊引二人導

皇太子前陞殿。女官二人導

妃隨陞。贊請就拜位。

皇太子與妃各就拜位。贊

皇太子兩拜。妃四拜。贊請陞座。

皇太子與妃皆陞座。女執事二人舉饌案進于

皇太子及妃之前。女官司樽者取金爵酌酒以進。皇太子與妃各受爵飲訖。女官進饌。

皇太子與妃皆舉饌訖。女官再以金爵進酒。

皇太子與妃飲訖。女官進饌。皆舉饌訖。女官再以

盃盞酌酒合和以進。

皇太子與妃皆飲訖。又進饌。

皇太子與妃皆舉饌。凡三舉酒饌畢。執事者徹饌

案。贊

皇太子與妃興。就拜位相向。贊兩拜如前儀畢。

皇太子從者餽

妃之饌。妃從者餽

皇太子之饌。

皇太子從者導

皇太子入宮更禮衣。妃從者及女官導

妃入宮易常服

兩宮朝見

第二日清晨。

皇太子冕服。

妃翟衣。女官贊引各啓請出宮。至

某宮門外以伺。

某宮服燕居服陞座。贊引引

皇太子及妃自左門入。

皇太子先入。

妃從之。贊禮贊詣

某宮前。

皇太子立于東。

妃立于西。宮人以殿脩盤立于

妃之右。贊

皇太子與妃皆四拜。執事二人舉案至

某宮前。宮人以殿脩盤授

妃。妃捧盤置于案。執事者舉案。

妃隨案進至

某宮前。妃復位。贊

皇太子與妃皆四拜興。執事者徹殿脩案于東。贊

禮畢。引

皇太子與妃出。詣

上位宮前伺。

上位具常服陞座。贊引引

皇太子及妃自左門入。詣

上位前。進棗栗盤。行禮同前。畢。詣

皇后宮進殿脩盤。行禮同前。畢。贊引引
皇太子及妃出。是日
賜皇太子與妃宴

盥饋

第三日清晨。

妃服翟衣。贊引引

妃至

某宮由左門入。伺膳至。贊引引

妃至前。贊四拜。尚食以膳授

妃。妃捧膳置于案。復位。又贊四拜禮。贊引引

妃退立于西南。伺膳畢。引

妃出陞轎。詣

乾清宮門外降轎。由左門入。伺膳至。贊引引

妃詣

上位前并

皇后前。禮俱同

廟見

第四日。內官于

奉先殿陳設牲醴。祝帛。贊引二人引

皇太子。二人引妃至

奉先殿詣

德祖玄皇帝

皇后神御前贊

皇太子與妃皆兩拜贊跪。

皇太子跪妃亦跪贊搢圭。

皇太子搢圭贊進帛執事者跪進于

皇太子右贊獻帛。

皇太子受帛以獻授執事者贊奠帛執事者以帛

奠于

神御前贊進爵執事者以爵跪進于右贊獻爵。

皇太子受爵以獻授執事者贊奠爵執事者以爵

奠于

神御前贊再進爵執事者以爵進贊獻爵。

皇太子受爵以獻授執事者贊奠爵執事者以爵

奠于

神御前贊俯伏興。

皇太子俯伏興妃亦興贊復位贊

皇太子與妃皆兩拜平身次詣

各廟禮同前贊詣讀祝位。

皇太子與妃詣讀祝位贊跪。

皇太子跪。妃亦跪。讀祝訖。贊俯伏興平身。

皇太子俯伏興平身。妃亦興。贊復位。贊

皇太子與妃皆兩拜平身。贊執事者捧祝帛。各詣

燎所。贊詣燎位。贊禮畢。引禮引

皇太子及妃還宮

慶賀

是日早。

上具皮弁服御

華蓋殿。執事官行禮。奏請陞殿。導

駕。樂作。陳設如常儀。文武百官具朝服。先行四拜

禮。鴻臚等官詣

丹陛上跪。致詞曰。某官臣某等。恭惟

皇太子嘉禮既成。益綿

宗社隆長之福。臣某等。不勝欣忭之至。謹當慶賀。

又四拜禮畢。

上起易服。

賜宴羣臣。如冬至正旦之儀

其日命婦慶賀

皇太后。行禮致詞如前。但致詞某官某夫人妻某氏等。後又改妻某氏等禮畢慶

皇后禮同前。但改致詞曰。

皇太子嘉聘禮成。益綿景福。餘並同禮畢。

皇太后賜宴命婦

大明會典卷之六十五

大明會典卷之六十六

禮部二十五

婚禮三

親王婚禮一

諸司職掌

定親禮物

金五十兩

珍珠一十兩重

用紅綠紗銷金袋二箇

花銀四百兩重

各色紵絲四十疋

用紅綠羅銷金束子一百

大紅羅二疋

用紅綠羅銷金束子六箇

生紗二疋 用紅綠羅銷金束子六箇

裏絹四十疋

綿膳脂一百箇。金花膳脂二兩重 用抹金對。

計六兩重

鉛粉二十袋計一十兩重 用紅綠羅銷金袋

北羊四牽 用紅綠羅銷金蓋祇四條。并牽羊

豬二口

鷺二十隻

酒八十瓶 用紅綠羅銷金小蓋祇八十條。每

圓餅八十箇 用紅紙花貼面

末茶一十袋 用紅綠羅銷金袋一十箇

果六合

白熟米二石 作四合。每合上用滌紅米二升

麪四十袋 用紅紙花貼面

媒人

紵絲二疋 用紅綠羅銷金束子六箇

裏絹二疋

開合

紵絲一疋 用紅綠羅銷金束子三箇

裏絹一疋

已上禮物媒人并內官一員送至

妃家媒人就引

妃家回奉禮物從

西華門入。如命官則

皇帝前後

命外命婦則

皇后前後

命

納徵禮物

玉穀圭一

累玉圭。錦袋二件。盛玉圭。餞金雲。鳳珠紅木匣一箇。內錦褥一片。

玄纁紵絲五疋

玄三疋。纁二疋。用紅綠羅銷。

珠翠燕居冠一項

冠上火珠博鬢結子等項全。

金鳳二箇。金寶鈿花二十七箇。金簪一對。

冠上珊瑚鳳冠一副。

燕居服四套

大紅紵絲一件

大紅線羅一件

大紅素紗一件

青線羅一件

大帶四條內大紅線羅三條。青線羅一條。

玉革帶一副

玉事件九件

金事件三件

玉花綵結綬一副紅綠線羅綵結。大紅線羅繫帶。

綵結上玉綵花一箇

綵帶上玉墜珠六顆

綵帶上金垂頭花板四片金葉兒六箇

白玉鈎碾鳳文珮一副

玉事件二十件。串珠全

金鈎二箇

紅羅銷金夾袂大小五條包燕居服及玉革帶等用。

珠面花四副

珠花四枝金脚八錢重

金脚四珠環一雙金脚五錢重

梅花環一雙金脚五錢重

金釵花釧一雙二十兩重

金光素釧一雙二十兩重

金龍頭連珠鐲一雙一十四兩重

金八寶鐲一雙八兩重。外寶石一十四塊

金四百兩 九成色二百兩。八成色二百兩

花銀一千六百兩

珍珠二十四兩重 用紅綠紗銷金袋二箇

寶鈔五十貫

乘馬四疋 紅籠頭錦韉四副

各色紵絲六十疋 用紅綠羅銷金束子一百

各色綾六十疋 用紅綠羅銷金束子一百八

各色紗六十疋 用紅綠羅銷金束子一百八

各色羅六十疋 用紅綠羅銷金束子一百八

各色錦六十疋 用紅綠羅銷金束子一百八

大紅羅四疋 用紅綠羅銷金束子一十二箇

生紗四疋 用紅綠羅銷金束子一十二箇

各色絹三百疋

白綿二十斤

臘脂二合重二兩 金臘脂合一對。重一十兩

鉛粉二十袋。重一十兩 用紅綠羅銷金袋二

北羊三十二牽 用紅綠銷金蓋祇三十二條。

豬一十六口

鷺三十二隻

酒二百瓶 用紅綠羅銷金蓋祇二百條。每條

末茶三十二袋 用紅綠羅銷金袋三十二箇

果二十合

響糖二合

芝麻纏糖二合

茶纏糖二合

砂仁糖二合

胡桃纏糖二合

木彈二合

蜜煎二合

棗子二合

乾葡萄二合

胡桃二合

圓餅六百箇 用紅紙花貼面

白麩一百二十袋 用紅紙花貼面

紅紗罩盞大小一十二箇

開合

紵絲八疋 用紅綠羅銷金束子二十四箇

媒人

紵絲一十二疋 用紅綠羅銷金束子三十六箇

納徵禮儀

前一日。尚寶司陳設

御座於

奉天殿。內官監禮部設冠服首飾金銀段疋等儀
物于文樓下。教坊司設中和樂于殿內。其日
清晨。錦衣衛設儀仗于

丹陛。丹墀之東西。教坊司設大樂于

丹陛之東西。北向。及設樂于

午門外。設護衛將軍文武官執事官如常儀。儀禮
司設百官侍立位于文武樓南。設玉帛案于
殿內之東。鼓三嚴。文武官具朝服至侍立位。

東西相向。鐘聲止。儀禮司跪奏請陞殿。

皇帝具皮弁服。導駕奉引如常儀。樂作。陞座。樂止。鳴
鞭訖。序班舉玉帛案置殿中。引正使副使入
就拜位。贊鞠躬。樂作。贊四拜興平身。樂止。承

制官詣

御前跪承

制。俯伏興。由東門稍東出序班舉玉帛案隨之。置
丹墀中道。承

制官稱有

制。贊禮贊跪。宣

制曰。今聘某官某女為

某王妃。命卿等行納徵禮。贊禮贊俯伏興。樂作。四拜平身。樂止。儀禮司奏禮畢。

駕興。樂作。鳴鞭。樂止。引禮引玉帛案由

奉天門東門及

午門東門出。置玉圭玄纁于綵輿。執事官引文樓

下儀物由

午門東門出。以次陳列。正副使行至

御橋外收服。乘馬至

妃家

妃家行納徵禮

前一日。

妃家設正副使幕次于大門外道左。南向。設香案于正堂中。設受玉帛案于香案之南。其日禮物至

妃家。引禮捧玉圭玄纁先行。正副使隨之。至幕次。執事者陳禮物及冠服等物于正堂。捧玉帛者俟于幕次。東西向。禮官一員先入。至正堂。立于東。西向。主婚者出見。立于東。西向。禮官曰。奉

制命正使其官某。副使其官某為

某王行納徵禮。引禮引主婚者出迎。引禮引正使

捧玉圭。副使捧玄纁先行。主婚者隨行。引禮

引至正堂。置玉圭玄纁于案。正使立于案之

左。西南向。副使立于案之右。東南向。贊禮引

主婚者就拜位。贊鞠躬四拜興平身。贊詣前

跪。贊捧圭。正使捧玉圭授主婚者。主婚者受

玉圭以授執事者。執事者跪受興。置于案。贊

捧帛。副使捧玄纁授主婚者。主婚者受玄纁

以授執事者。執事者跪受興。置于案。贊主婚

者俯伏興平身。贊復位。贊四拜興平身。禮畢。

正副使出。主婚者至正副使前致詞云。請禮

從者。酒饌畢。主婚者捧帛以勞正副使。正副

使出。主婚者送至門外。正副使詣

皇帝前復

命。妃家回儀。從

西華門入。內官監監官奏

聞

發冊儀物

金冊一副。兩葉。計足色金一百兩。重造。每葉高一尺二寸。闊五寸。周尺。

藉冊錦一片 紅絹裏

聯貫冊葉 用紅絲條

墊冊錦褥一箇 紅絹裏

裹冊紅羅銷金小夾袂一條

渾金瀝粉雲鳳冊盃一箇 內用紅紵絲發
襯花銀釘鉸一副

副重一兩二錢。嵌金絲鐵鎖鑰一副

覆盃紅羅銷金大夾袂一條

九暈四鳳冠一頂

冠上大花九樹。小花九樹。寶鈿九箇。翠雲博鬢。描金珠皂羅額。珠眉心。珠牌環。金冠

上金鳳四箇

牌環脚一雙

翟衣三套。描金雲鳳沉香色木匣一箇 銅鎖

扛金

青紵絲繡翟衣一件。青紵絲繡蔽膝一件。

玉色線羅中單一件。紅綠襪

青線羅繡翟衣一件。青線羅繡蔽膝一件。

玉色線羅中單一件。紅綠襪

青紗繡翟衣一件。青紗繡蔽膝一件。玉色

紗中單一件

青紅線羅銷金大帶一條。上有青紵絲副帶一條。

五色線錦綬一副。上有玉環二箇。青紅羅線結全。

白玉鈎碾鳳文珮一副。

玉事件二十件。串珠全。

金鈎子并圈二箇。

五色線錦襯一副。

白玉革帶一副。青紵絲累鞋描金文翟衣。

玉事件一十件。

金事件五件。

青紵絲鬃一雙。上有珠六顆。

青羅襪一雙。

紅羅銷金夾袂大小五條。包累翟衣玉珮玉。

鳳轎一乘。

錦坐褥一箇。

錦踏褥一箇。

紅交床一把。紅穿條全。

紅簾一扇。青羅銷金沿邊繡帶全。

紅羅銷金轎衣一件。瀝水頂單全。

紅油絹銷金雨轎衣一件 瀝水頂罩全
綵結四串 抹金銀香圓寶蓋四副 計八件
一十六兩 共花銀

儀仗

紅杖二

清道旗二

絳引幡二

戟斃二

班劍二

儀刀二

結子絹袋全

結子紅絹袋全

梧杖二

絹袋全

鐙杖二

絹袋全

立瓜二

絹袋全

卧瓜二

絹袋全

骨朶二

絹袋全

響節四

絹袋全

紅繡傘一把

絹袋全

青方傘二把

絹袋全

紅繡團扇四把

絹袋全

青繡團扇四把

絹袋全

紅紗燈籠四箇竿全

拂子二箇結子全

坐障一竿全

行障二竿全

抹金交椅脚踏一副。除木外。計花銀一百兩。重搭座踏褥結子全。

抹金銀水罐一箇。重六十兩。

抹金銀水盆一箇。重六十兩。

抹金銀唾壺一箇。重一十六兩。

抹金銀唾盂一箇。重一十六兩。

抹金銀香爐一箇。重一十六兩。

抹金銀香合一箇。重一十六兩。

擎執官人銷金羅袍一十四領。抹金釵花銀

帶一十四條。翠花紗帽一十四頂。皂麂皮鞋

一十四雙

女轎夫衣袍一十六領。汗跨一十六副。銅束

帶一十六條。花紗帽一十六頂。紅綿布鞵鞋

一十六雙

發冊命使儀注

其日清晨。內官監錦衣衛尚寶司教坊司文

武執事等官于

奉天殿陳設如納徵儀儀禮司設冊案于殿內之

東承

制官持節官位于殿內之東。西向。設正使副使拜位于丹墀。正使在東。副使在西。錦衣衛設蓋冊黃傘一于殿門外。禮部陳設綵輿于

午門外。內官陳

王妃鳳轎儀伏于綵輿之南。鼓三嚴。引禮引文武官入就侍立位。鍾聲止。儀禮司跪奏請陞殿。皇帝服皮弁服。導

駕官奉引如常儀。樂作。陞座。樂止。捲簾。鳴鞭。訖。引禮引正副使各就拜位。贊禮贊鞠躬。樂作。贊四拜平身。樂止。承

制官詣

御前跪承

制。俯伏興。由東門稍東出。持節官舉節。舉冊官舉案隨行。亦由東門稍東出。校尉擎傘遮護。冊行至丹墀御道中。持節官立于案東。西向。傳

制官稱有

制。贊禮唱跪。宣

制曰。今冊某官某女為

某王妃。命卿等持節行禮。贊禮贊俯伏興。鞠躬四拜。興平身。樂止。持節官以節授正使。引禮引節冊及正副使由東道至。

奉天門由東門出。至

午門外。置冊于綵輿。儀禮司官奏禮畢。

駕興。樂作。百官捲班以次出。儀仗鳳轎前行。引禮

引節及綵輿。正副使隨行過

御橋。收服持節。正副使俱上馬。至

妃府行冊禮

冊至妃家行禮儀注

是日。

妃府先設幕次于大門之外。南向。設香案于正廳。

冊使至。引禮引正副使至幕次。禮官先入見

主婚者。禮官曰。奉

制命正使某官某。副使某官某。持節行冊禮。主婚

者出迎。引禮引正使持節。副使捧冊入。主婚

者隨行。至正廳。正副使立于香案東南向。引

禮引主婚者至拜位。贊禮贊鞠躬四拜。興平

身。退立于西南。引禮引接冊內官詣前。贊禮

贊舉冊。副使以冊授內官。內官跪受訖。贊禮
贊請詣中堂行禮。內使二人引捧冊。內官入
中堂。正副使仍前立。候內官出。告行禮畢。正
使副使以節出。主婚者請禮正副使。如納徵
儀

受冊儀注

其日。

妃府陳設香案于中堂。設冊案于香案之南。設
妃拜位于冊案之南。
妃服翟衣訖。俟內官捧冊入。置于案。贊禮女官一

員居東。一員居西。在

妃拜位前。相向立。宣冊女官展冊。女官立于東。引
禮女官二員分左右引

妃出房。至冊案前拜位。女使執事者立于西。贊禮
女官贊四拜興。宣冊女官稱有

制。女官贊跪。

妃跪。贊宣冊。宣冊女官詣冊案前。取冊立。宣于香
案東。女官宣冊訖。以冊入於盥。贊受冊。宣冊
官捧冊立授

妃。妃受冊。女官贊以冊授執事者。

妃以冊授女使。女使跪受。興置於案。女官贊妃興。又贊四拜。禮畢。內官出告正副使。行禮畢。執事者徹香案。冊案。設

妃座。引禮請

妃降座。眾命婦及應賀者序立于庭。北向。贊四拜。禮畢。

妃降座

催粧禮物

北羊二牽 紅綠絹銷金蓋祇二條
酒二十瓶 紅綠羅銷金蓋瓶祇二十條。每條墜角折二銅錢四箇

果二合 用花四枝

已上禮物。內官一員送至

妃家

鋪房

一

妃家於親迎前擇日。將房奩床帳等物至

王府鋪房。禮部預先奏知。至日

妃家備鼓樂迎引從

午門東角門入。鼓樂止於闕西。

妃母。或親戚入

內陳設

醮戒儀注

其日內官監設

上位

中宮御座于宮中。設大樂儀仗于

丹陛之東西。執膳內官先備酒金爵果合以俟。

上位服皮弁服。

中宮燕居服出。樂作陞座。樂止。

王服衮冕。贊引引

王由殿東門入。詣

上位前。贊禮贊鞠躬。樂作。贊四拜興平身。樂止。執事者以爵斟酒立于

御前之東。贊禮贊

王詣前跪。贊搢圭。贊受爵。執事者以爵立授

王。王受爵飲訖。以爵授執事者。執事者跪受以退。

贊禮贊出。圭恭聽

戒命。隨旨意致戒詞。

王聽戒辭訖。贊俯伏興平身。贊復位。贊鞠躬。樂作。

贊四拜興平身。樂止。贊禮引

王詣

中宮前禮同贊禮畢引禮引

王出收衮冕具皮弁服行親迎禮

妃受醮戒儀

親迎日。

妃家先於祠堂陳設祭物。

妃服燕居冠服。妃父母同

妃詣祖宗前奠酒讀祝禮畢執事者具酒饌命

妃飲食訖。父母坐於正堂。女執事引

妃詣父母前各四拜。父母隨意致戒辭。

妃聽受訖。次辭諸尊長。禮畢改服翟衣以俟

親迎儀注

其日儀衛司先設

王儀仗象輅于

承天門外。

妃家先設

王幕次于中門之外。設香案帛案于正堂之中。是

日。

王受

命訖。引禮引

王由

午門東門出。典儀具服。跪請陞輅。

王陞輅。儀從前導。過

御橋。樂作。至

妃家門外。引禮跪請

王降輅。導引至幕次。禮官一員先入。至正廳。立于

東西向。主婚者出見。立于西。東向。禮官曰。

某王奉

制行親迎禮。引禮二人具服。引主婚者迎

王于幕次之外。內官二員具服。引

王出幕次。主婚者請

王入中堂。

王先行。主婚者後。隨內官具服。捧禮物入。至于中

堂。主婚者進。立于堂中之左。

妃母立于堂中之右。東西相向。

王至中堂。女執事二人引

妃出房。立于妃母之下。內官引

王至案前。內官捧帛進

王。王以帛置于案。內官引

王稍退。近東。西向立。贊禮引主婚詣帛案前。行八

拜禮。退復位。執事者徹案。引禮內官導

王先出。女轎夫舉鳳轎至于中門之內。內官具
妃儀。伏于中門之外。女執事引
妃出。內官跪啓請

王詣轎所。啓請揭簾。妃陞轎。內官啓請
王陞輅前行。妃具儀從後行。

王至

承天門外。降輅。候

妃至。內官跪啓請

王揭簾。妃降轎。

王先行至內。釋皮弁服。具袞冕。至

奉先殿前俟。妃入

午門。陞轎。將至

奉先殿。降轎。行

廟見禮

廟見儀注

是日。內官于

奉先殿陳設牲醴。祝帛訖。每廟猪一。羊一。帛二。共一
筐。祝共一。贊引二人引

王。二人引妃至

奉先殿。詣

德祖玄皇帝皇后神御前。

王在東。妃在西。贊

主與妃皆兩拜。贊跪。

王跪。妃亦跪。贊搢圭。

王搢圭。贊進帛。執事者以帛跪進於

王右。贊受帛。

王受帛。以授執事者。贊奠帛。執事者以帛奠

神御前。贊進爵。執事者以爵跪進于

王右。贊受爵。

王受爵。以授執事者。贊獻爵。執事者以爵奠于

玄皇帝皇后前。贊再進爵。執事者以爵進。贊受爵。

王受爵。以授執事者。贊獻爵。執事者以爵奠于

玄皇帝皇后前。贊俯伏興。

王俯伏興。妃亦興。贊

王復位。贊王與妃皆兩拜平身。次詣

懿祖皇帝皇后

熙祖皇帝皇后。

仁祖皇帝皇后。儀同上。贊詣讀祝位。

王詣讀祝位。贊跪。

王跪。妃亦跪。讀祝訖。贊俯伏興平身

王俯伏興平身。妃亦興。贊

王復位。贊

王與妃皆兩拜平身。贊執事者捧祝帛各詣燎所。贊詣燎位。

王與妃詣燎位。贊禮畢。引禮引

王及妃還宮。行合卺禮

合卺儀注

其日內官先於

王宮設

王座于東。西向。設

妃座于西。東向。各設拜位于座之南。設酒案于正

中。稍南。置兩爵。兩卺于案上。執事者啓請

王具皮弁服。訖。贊引導。

王與妃至宮門。贊引二人導。

王前陞。二人導。

妃後陞。贊請就拜位。

王與妃各就拜位。贊兩拜。

王與妃皆兩拜。訖。贊請陞座。

王與妃皆陞座。執事者二人舉饌案進于。

王及妃之前。女官司尊者取金爵盞酌酒以進。

王與妃各受爵飲訖。女官進饌。

王與妃皆舉饌訖。女官再以金爵進酒。

王與妃皆飲訖。女官進饌。

王與妃皆舉饌訖。女官再以盃盞酌酒。合以進。

王與妃皆飲訖。又進饌。

王與妃皆舉饌。凡三舉酒饌畢。執事者徹饌案。贊

王與妃興。就拜位。相向。贊兩拜禮畢。

王從者餽妃之饌。

妃從者餽

王之饌

朝見儀注

第二日清晨

王冕服。妃翟衣。贊引各啓請出宮。至宮門外以俟。

皇帝服皮弁服。

中宮服燕居服。陞座。贊引引

王及妃自東門入。

王先入。妃從之。贊禮贊詣

皇帝前。王立于東。妃立于西。官人以棗栗盤立于

妃之右。贊

王與妃皆四拜。執事者二人舉案至

皇帝前。宮人以棗栗盤授妃。妃捧棗栗盤置于案上。
執事者舉案。

妃隨捧進至

皇帝前。妃復位。贊禮贊

王與妃皆四拜興。贊引引

王及妃詣

皇后前。宮人以殿脩盤立于妃左。贊

王與妃皆四拜興。執事者二人舉案至

皇后前。正中。宮人以殿脩盤授妃。妃捧殿脩盤置于

案上。執事者舉案。

妃隨舉進至

皇后前。妃復位。贊四拜。

王與妃皆四拜興。執事者以

皇帝前。棗栗案徹于東。

皇后前。殿脩案徹于西。贊禮畢。贊引引

王及妃出。是日。

賜王與妃宴

盥饋

第三日清晨。

妃服翟衣。贊引引

妃出陞輿。將至

宮內門。降輿。由東門入。俟膳至。贊引引

妃詣

皇帝前。贊四拜。尚食以膳授

妃。妃捧膳置于案。復位。又贊四拜。贊引引

妃詣

皇后前。禮同。贊引引

妃退立于西南。俟膳畢。贊引引

妃出

王與妃見東宮儀注

是日。

王與妃朝見訖。

王具皮弁服。

妃服翟衣。詣

東宮前行四拜禮。

東宮皮弁服。坐受。

東宮妃翟衣。立受兩拜。答兩拜

回門禮物

花銀三百兩重

雜色紵絲三十二疋

紅六箇 羅銷金束子九十

北羊四牽

紅綠絹銷金蓋袱四條。紅麻索四

酒四十瓶

紅綠羅銷金蓋袱四十箇

果四合

回門儀注

其日內官先將禮物至

妃家。

王與妃儀仗導從如常儀。

王先行至妃府。妃父出迎。

王先入。妃父從之。至正廳。

王立東。西向。妃父立於西。東向。

王於妃父母前行四拜禮。

妃父母立受兩拜。答兩拜。禮畢。

王中坐。其餘親屬見

王。行四拜禮。

王皆坐受。

妃至。入中堂。於父母前行四拜禮。父母正面坐受。

其餘親屬見

妃。各序家人禮

王府供用器皿

金器

壺瓶一對。六十兩重

酒注一對。六十兩重

孟子一對。二十兩重

贄禮盤二面。六十兩重

盤盞二副。二十兩重

托裏胡桃木椀四箇。六十四兩重

楞邊胡桃木托子四箇。五兩重

托裏胡桃木鍾子一對。一十一兩重

撒盞一對。八兩重

葫蘆盤盞一副。一十兩重

銀器

茶匙一雙。一兩重

匙一雙。五兩重

筯一雙。五兩重

果盒一對。一百六十兩重

汁瓶二對。一百兩重

茶瓶一對。五十兩重

湯鼓四箇。八十兩重

按酒櫟一十二箇。四十二兩重

果櫟一十二箇。三十兩重

菜牒一十二箇。二十四兩重

漆器

硃紅戲金大托盤二面 紅紗罩二

硃紅戲金饅頭肉盤四箇 紅紗罩二

小車子一乘。貼金釘鉸金并頂上抹金銅

火珠一箇。四角銅鳳四箇

紅紵絲車衣一副。頂裙瀝水頂裏紫羅帶

全

錦坐褥一箇。黃綿布骨子。黃絹裏。綿花裝

紅平羅車衣一副。頂裙瀝水頂裏絹紫羅

帶全

錦靠褥二箇。綠紵絲邊。黃綿布骨子。黃絹

裏。綿花裝

紅素油絹雨衣一副

紅油儀仗木架二座

大明會典卷之六十六

大明會典卷之六十七

禮部二十六

親王婚禮二

洪武二十七年更定

凡

親王納妃。預擇親迎日期。別擇日行定親。納徵發冊催粧等禮。其禮物仍依節次名數。同日給送

納徵發冊催粧

前期一日。內官監禮部儀禮司。設冠服首飾金銀段疋等儀物于文樓下。設玉帛案冊案

并節于

奉天殿內。至日早。禮部設綵輿。教坊司設樂于
午門外。內官設

王妃鳳轎儀仗於綵輿之南。

皇帝具皮弁服陞殿。百官侍班。正副使先行四拜禮。
執事官舉節及玉帛案冊案。至丹墀。置案於
中道。持節俟立。傳

制官宣

制曰。今聘某官某女為

某王妃。命卿等行納徵發冊等禮。正副使又四拜

禮畢。執事官以節授正使。引禮引節并玉帛
案冊案冠服等物。至

午門外。置冊及玉帛於綵輿。冠服等物以次陳列
而行

妃家受聘

前期一日。

妃家設香案節案于正堂中。玉帛案冊案。左右相
向。至日禮物至

妃家主婚者出迎。引禮引正使持節。副使捧冊。執
事者捧玉帛。至正堂。各置于案。正副使立於

案左右。冠服等物以次陳列。禮官一員立於左。主婚者立於右。禮官曰奉

制。命正使某官某。副使某官某。為

某王行納徵發冊等禮。引禮引主婚者詣香案前行四拜禮。執事官捧玉圭玄纁。主婚者先受玉圭。次受玄纁。各授執事。再行四拜禮畢。內官先以冠服進于

妃。具服訖。內官詣冊案跪捧冊入中堂置于案。引

禮女官引

妃出至冊案前。行四拜禮。跪。女官宣冊訖。

妃受冊。以授執事者。再行四拜禮畢。執事者設

妃座。引禮請

妃陞座。妃家應賀者行四拜禮。正副使俟內官出

告行禮畢。持節出。主婚者送至門外。正副使

回朝復

命。妃家回奉禮物。從

午門入。內官監官奏

聞

醮戒

其日。

皇帝具皮弁服。執膳內官備金爵酒果。

王具袞冕行四拜禮。執事者斟酒立授

王。王跪飲聽

戒命訖。再行四拜禮。復詣

皇后前禮同

親迎

前一日。

妃家令親人鋪房。至日

王親迎。儀衛司先設

王儀仗。教坊司設樂于

長安門外。妃家先設

王幕次于中門之外。香案帛案于中堂。是日。

王受戒命訖。具皮弁服陞輦。至

妃家幕次。禮官先入正廳。立于東。主婚者立于西。

禮官曰。

某王奉

制行親迎禮。主婚者詣幕次迎

王。王前行。主婚者後隨。至中堂。內官捧禮物入中

堂。主婚者立於左。

妃母立於右。女執事二人引

妃出立于妃母之下。內官以帛進

王。王受帛置于案。

王立于案左。贊禮引主婚者詣帛案前。行八拜禮

畢。引禮內官引

王先出中門外。詣妃轎所揭簾。妃陞轎。

王陞輦前行。妃具儀從後行。

王至長安門外降輦。俟妃至揭簾。妃降轎。

王先行。至內。釋皮弁服。具袞冕。與妃詣

奉先殿行禮

廟見

是日內官先于

奉先殿陳設牲醴祝帛訖。引禮引

王與妃詣

四廟

帝后神御前行四拜禮。獻帛獻爵讀祝訖。又行四拜

禮畢。還宮

合卷

其日內官先於

王宮設

王座妃座東西相向。各設拜位于座之南。

王具皮弁服。妃服鞠衣。行拜禮。

王再拜。妃俠拜。執事者設酒案于正中。饌案于左。右。置兩爵兩盃于酒案。

王與妃陞座。執事者舉饌案進于。

王及妃之前。女官以爵進酒。

王與妃飲訖。進饌。饌訖。再進酒。饌如前儀。又以盃。蓋斟酒進。皆飲訖。進饌。皆饌訖。徹案。

王從者餽妃之饌。

妃從者餽

王之饌

朝見

次日早。

王具冕服。

妃具霞帔。褶子。

皇帝服皮弁服。引禮引

王與妃詣

御前。官人以棗栗盤立于

王妃之右。

王與妃各行四拜禮。執事二人舉案。

妃隨捧進至

御前。王與妃又行四拜禮。復詣
皇后前。獻服備如前儀。禮畢。
賜王與妃宴

回門

其日。內官先以禮物至
妃家。

王與妃導從如常儀。

王先至妃家。妃父出迎至正廳。

王于妃父母前行四拜禮。

妃父母立受兩拜。答兩拜。

王至中堂坐。其餘親屬見

王行四拜禮。

妃至。入中堂。於父母前行四拜禮。其餘親屬於
妃前行家人禮

弘治中。續增醮戒等儀。其納徵日。

上先具衮冕詣

奉先殿。用樂祭告禮畢。然後易皮弁服。傳

制。其醮戒儀。是日內執事設

太皇太后

皇太后御座于宮中。設大樂儀仗于

丹陛之東西。執膳內官先備酒金爵果盒以候。
太皇太后具燕居服。樂作。陞座樂止。

王服袞冕。贊引引

王由東門入。詣

太皇太后前。贊鞠躬。樂作。贊四拜興平身。樂止。執事者以爵斟酒立於東。贊禮贊

王詣前跪。贊搯圭。贊受爵。執事者以爵立授

王。王受爵飲訖。以爵授執事者。執事者跪受以退。

贊出圭。恭聽

戒命。往迎尔相。用成厥家。勉率以敬。為國之光。

王聽戒辭訖。贊俯伏興平身。贊復位。贊鞠躬。樂作。贊四拜興平身。樂止。贊禮畢。贊禮引

王詣

皇太后官門外。由東門入。詣

皇太后前。贊鞠躬。樂作。贊四拜興平身。樂止。執事者以爵斟酒立於東。贊禮贊

王詣前跪。贊搯圭。贊受爵。執事者以爵立授

王。王受爵飲訖。以爵授執事者。執事者跪受以退。

贊禮贊出圭。恭聽

戒命。往迎尔相。承厥家事。勉率以敬。無忝

戒命。

王聽訖。贊俯伏興平身。贊復位。贊鞠躬。樂作贊四拜興平身。樂止。贊禮畢。贊禮引。

王詣

上位宮門外候。

上具常服。

皇后具燕居服。陞座。贊禮引。

王詣

上位前。行五拜三叩頭禮畢。引。

王出。釋袞冕。具皮弁服。行親迎禮。其

妃受醮戒儀。親迎日。

妃家先于祠堂陳設祭物。

妃服燕居冠服。妃父母同。

妃詣祖宗前行禮。奠酒讀祝。禮畢。執事者具酒饌于內。進。

妃飲食訖。父母坐于正堂。女執事引。

妃詣父母前各四拜。父母隨意致戒詞。

妃聽受訖。次詣諸尊長行禮畢。改服翟衣以俟親迎。其朝見儀。第二日清晨。

王冕服。妃翟衣。贊引各啓請出宮。至皇城内宮門。

外以俟。

太皇太后燕居服陞座。贊引引

主及妃自東門入。

王先入。妃從之。贊禮贊引詣

太皇太后前。

王立于東。妃立于西。宮人以殿脩盤立于

妃之左。贊

王與妃皆四拜。執事二人舉案至

太皇太后前。宮人以殿脩盤授

妃。妃捧殿脩盤置于案。執事者舉案。

妃隨案進至

太皇太后前。妃復位。贊

王與妃皆四拜。興。執事者徹殿脩盤案于東。贊禮

畢。引

王與妃出詣

皇太后官前俟。

皇太后燕居服陞座。引禮引

王及妃自東門入詣

皇太后前。進殿脩盤。行禮同前。畢。出詣

上位官前俟。

上具常服。陞座。贊引引。

王及妃自東門詣。

上位前。進棗栗盤。

皇后前進。服脩盤。行禮同前。畢。贊引引。

王及妃出。是日。

賜王與妃宴。

王與妃見。

東宮。是日。王與妃朝見訖。

王具皮弁服。

妃服翟衣。詣。

大東宮前行四拜禮。

東宮皮弁服坐受。其盥饋儀。第三日清晨。

妃服翟衣。贊引引。

妃出陞輿。將至宮內門。降輿由東門入。俟膳至。贊

引引。

妃詣。

太皇太后前。贊四拜。尚食以膳授。

妃。妃捧膳置于案。復位。又贊四拜。贊引引。

妃退立于西南。俟膳畢。引。

妃出詣。

皇太后前行禮同。復詣

上位前。

皇后前行禮同。

大明會典卷之六十七

